

---

# **NEPIRSIN ÇIMA?**

**Cankurd**

---

“Min deftera xwe da hev  
û pênûsê xwe şikand  
Min pencereya xwe,  
ya bi ser Rojhilat ve vekirî bû,  
girt  
Min çireya ser xwe vemirand  
û stêrka xwe ya li ezmên,  
bi xwe rijand  
Dizanim ji rê hîn pir maye  
Rêyek bi rojan û şeva ye  
Bi salan û meha ye  
Lê ji bo xatirê Xwedê  
Ne pirsin: Çima?  
Ji heupeyvîn û pirsan re  
Dem a dilê minê melûl  
tew nema..

Bila ez keviyek bama  
di sîngê „Keloşkê“

Bi dîtina deştê têr bibama

Bila ez darek hejîrê bama  
li ber zinarê „Bûkê“  
bila bi tenê xwe bama

Bila ez şalûrek bama  
li geliyê „Tîra“  
An jî kanîsarkek bama  
li nav çiyayê „Hawarê“  
bi avdana qerajên zuwa,  
bila ez mijûl bibama

An jî tew nebama  
tune bama...

Ma ne bese?

Her roj di ser serê te re  
di paş piştê te re  
di ber sîngê te re

---

û di nav çavên te re  
Ev şanowa direwkaran  
Li ser sîngê neteweyeka bindest  
û hejaran  
Van şergehên hevşwaran  
û ev tablawa gurên çile, zik-  
birçî û dev bi xwîn...  
va tablawa hezar hezar tofan  
û maran

Ma ne bese?  
Van devgezên rojane?  
Va reva mezin a, bê behane?  
Ji her şêweyekî dirûtî û direw?  
û tev ji hev re bûne kew?"

Helbestvan ji tariyê re wilo got.  
Devê xwe jî bi heft kêliyan dirût

û di destpêka beharê  
xwe ji jor ve avêt xarê...

Ji wê rojê ve  
Helbestan bû şepeleka bi xumx-  
um û lêwlêw  
ji wan şepelên ava robarê.

09.08.2006

